

每週經課朗誦經文(巴克禮台語漢字)2013/07/14

共同經課 - 1 阿摩司書七章七節~十七節

7 伊閣互我看見一項：看啊，有一對牆是照繩線起的，主倚佇彼頂面手提繩線。8 耶和華對我講：「阿摩司啊，你看見甚麼？」我講：「看見繩線。」主講：「看啊，我欲牽繩線佇我的百姓以色列中，我無欲閣寬恕 in。」9 以撒的山頭壇欲拋荒，以色列的聖所欲荒廢。我欲起來，用刀攻擊耶羅波安的家。」10 當時伯特利的祭司亞瑪謝差人到以色列王耶羅波安遐，講：「阿摩司佇以色列族中計謀攻擊你；此個地方袂堪得伊講諸個話；11 因為阿摩司按呢講：『耶羅波安欲互刀剖死，以色列百姓決斷欲受掠離開本所在。』」12 亞瑪謝閣對阿摩司講：「你此個先見啊，去啊，著走去猶大地，佇遐趁食，佇遐做先知，13 總是毋通閣佇伯特利講先知話；因為佇遮有王的聖所，有王家的宮殿。」14 阿摩司就對亞瑪謝講：「我本毋是先知，亦毋是先知的子。我是飼精牲的人，閣是治理桑材樹者。15 我啲顧羊群的時，耶和華揀召我，耶和華對我講：『去啊，對我的百姓以色列宣傳。』16 今你著聽耶和華的話。你講：『毋通宣傳來攻擊以色列，毋通講話來攻擊以撒的家。』17 所以耶和華按呢講：『你的某欲佇城內做娼妓，你的子查某子欲死佇刀下；你的地人欲用索量來分伊，你本身欲死佇污穢的所在。以色列百姓決斷欲受掠離開本所在。』」

共同經課 - 2 詩篇八十二篇

1 [亞薩的詩。] 上帝倚佇上帝的會中，佇諸個上帝的中間啲審判，2 恁審判無照公義，循歹人的情面，欲到底時啊？(細拉) 3 恁著給喪鄉人及無父的子伸冤；著給困苦及欠缺的人行公義。4 著拯救喪鄉及欠缺的人，互 in 脫離歹人的手。5 in 毋知，亦無明理，in 佇黑暗中行來行去；地的根基攏搖動。6 我曾講：恁是上帝，恁攏是至高者的子。7 總是，恁會死，及世間人一樣，欲倒落去，親像貴族的一個。8 上帝啊，求你起來審判世界，因為你欲得著萬國做基業。

共同經課 - 3 歌羅西書一章一節~十四節

1 對上帝的旨意，做基督耶穌的使徒保羅及兄弟提摩太，2 批寄互歌羅西恁基督的聖徒，忠信的兄弟。願恁對咱的父上帝得著恩典、平安！3 阮常常替恁祈禱，感謝上帝就是咱的主耶穌基督的父；4 因為曾聽見恁佇基督耶穌的信，及向攏總的聖徒所有的疼，5 因為所給恁囡佇天裡的向望；就是恁前佇福音真理的道所聽見的。6 此個福音已經到恁，親像恁遍世間啲結果子，也愈大攏，親像恁恁中間一樣，對恁曾聽見也真實知上帝的恩典彼日。7 親像恁對以巴弗所學習的，伊是阮所疼、同做奴僕的。也為著阮做基督忠信的差用，8 伊也曾將恁佇聖神的仁愛報阮知。9 所以，阮對聽見的日，替恁祈禱懇求無息，願恁佇神靈逐樣的智慧及靈通，得著知伊的旨意到滿滿；10 互恁所行合佇主，凡事互伊歡喜，佇逐項好事結果子，閣識上帝愈久愈進步；11 閣照伊榮光的氣力，用逐樣的權能互恁有權能，致到恁凡事歡喜吞懷寬容；12 閣感謝父，因為伊互咱堪得有份聖徒的業佇光明的所在。13 伊已經救咱脫離黑暗的權勢，來搬徙咱入伊所疼的子的國；14 恁佇伊咱得著贖回，就是咱的罪赦免。

共同經課 - 4 路加福音十章二十五節~三十七節

25 有一個教律法的先生起來試伊，講：「先生啊！我著怎樣做才會得著永活？」26 耶穌對伊講：「佇律法有記甚麼？你讀了怎樣？」27 伊應講：「你著盡心、盡性、盡力、盡意疼主——你的上帝；也著疼厝邊親像家己。」28 耶穌給伊講：「你所應的是著；行此個，就會活。」29 若是伊愛顯明家己做著，就對耶穌講：「是誰是我的厝邊？」30 耶穌應伊講：「有一人對耶路撒冷落去耶利哥，抵著賊剝伊的衣裳，拍伊到半死，放下啲做 in 去。31 湊巧有一個祭司對彼條路落去，看見伊，就閃對彼旁過去。32 閣有一個利未人到彼所在，看了，猶原對彼旁過去。33 獨獨有一個撒瑪利亞人行路對遐過，看見就憐憫伊，34 近倚用酒斟佇伊著傷的所在，給伊包啲，將家己的精牲互伊騎，導伊到客店來照顧伊。35 隔日提銀仔二個，互店主，講：『著照顧此人；所費若卡加，我倒轉來才還你。』36 此三人中你拍算叨落一個做抵著賊彼人的厝邊？」37 伊講：「憐憫伊的就是。」耶穌給伊講：「你去照按呢來行。」